

INUIT ATAQATIGIIT

Inatsisartuni



UKA 2018/195
03.10.18.
Aqqaluaq B. Egede

Uunga siunnersuut: Soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2018-imeersoq (Inatsisip atuuffiata ilaneqarnera)

(Aningaasaqarnermut Naalakkersuisoq)

Matumani inatsisip allannguuteqarnikuunerata kingorna malitseqaataasumik inatsisip naleqqussarniarneqarnerat paasinarpoq. Naalakkersuisullu soraarnerussutisiaqartarneq pillugu inatsisiliornikkut aqqissuussinerit ingerlataat pingaaruteqartut avataasigut aamma utoqqaat nunatsinni atugaasa siunissami pitsanngorsarnissaat siunertaralugit aqqissuusseqqinnerit Inuit Ataqatigiinniit ujartorpagut.

Naalakkersuinikkut naluneqanngilaq ukiuni aggersuni inuit utoqqalinersiaqartut amerliartuinnassasut. Allatut oqaatigalugu pisariaqaleraluttuinnarpoq nunatsinni utoqqaat pillugit aamma ineqarneq pillugu kiisalu akileraartarneq pillugu aqqissuusseqqinnerit annertuut timitalersuiffigineqarnissaat. Pingaaqaaq suliaasat annertuut naalakkersuinikkut pimoorussamik kipisaqattaanngitsumillu ingerlanneqarnissaat. Neriutigaarpullu naalakkersuisut aqqissuusseqqinnerit pisavut kinguarsarnagit aallarteriigaammata nangittumik ingerlatissagaat.

Massakkut nunatta karsiata aningaasarsissutissaat kisiisa sammineqarnerat immiini ajunngilaq. Pingaaruteqarluinnarporli aamma inuiaqatigiinni ineqarnikkut, akileraartarnikkut aamma nunatsinni utoqqaanissamut kajumissarsaasumik aqqissuussinerit nunap inuinit kajuminnarnerulernissaat. Nunatsinni inuuniarnikkut atukkat siuarsartariaqarput. Nunap aningaasaqarnera pitsaasuunerartarutsigu aamma nunap inuisa atugaat sapinngisamik pitsaasuusariaqarput. Taamaammat inuuniarnikkut atukkat aqqissuusseqqinnerup kingorna pitsaassutsimik qaffassaasussat utaqqissussinnaanngilagut, suliarisariaqarpullu.

Inatsisissatut siunnersuummi akuerineqarnikumi allannguutissatut siunnersuutit tunngaviatigut isumaqatigaagut. Ataatsimiititaliamilu susassaqtaruni peqqissaarussamik suliarineqarnissaat kaammattuutigaagut. Taamatut oqaaseqarluta Inuit Ataqatigiinniit inassutigissavarput Inatsisartut Aningaasaqarnermut

Ataatsimiititaliaani peqqissaartumik suliarineqartussanngorlugu ingerlatinneqassasoq.
Ataatsimiititaliap sulinermini suliamut tunngatillugu inerniliussai utaqqimaassavagut.